

que & benivolentiam inter ipsos esse constitutam; non illam quidem, ut cuiusque nocerent, sed suarum utriusque rerum & regnorum tuendorum causa. Patres auri libra in sumptum mensibus singulis legato regio a quaestoribus dari iussa, Nihil se fecisse reliqui dixerunt orando, pollicendo, uti Fulvium placarent: descendisse enim etiam ad illud, tametsi Alexander Faventiam, & reliqua oppida Cæsari libera immuniæ dederit; velle tamen se stipendiarios Romanæ reipublicæ fieri, Faventiæ Ariminique nomine: legem ipse stipendiorum diceret, nihil se recusaturos, auroque Veneto recenter signato annis omnibus ea libenter persoluturos: neque quidquam tamen profecisse. cæterum lætari se, duorum tantorum regum animos ab odio exercendo ad pacem & benivolentiam esse conversos. verum, propterea quod in fœdere, quod reipublicæ cum Aloisio intercedebat, caput unum erat ejusmodi, neutri sine alterius voluntate fœdus ullum cum rege ullo facere licere, scire Patres cupere, cur de eo rex nihil antea Senatui significavisset. Ad ea legatus cum aliquandiu siluisset, tandem se scire nihil respondit, nisi unum, ei fœderi tempus quatuor mensium esse præstitutum, quos uterque velit, sibi socios & fœderatos nominandi: itaque posse adhuc quidem regem ei fœderi inserere rempublicam. Qui legati tamen sermo Patrum animos, quibus quidem ea pax Senatu non appellato confecta, suspicionem haud parvam afferebat, nihil leniit.

Post hæc Decemviri certiores facti servi indicio, qui ab eo vapulaverat, Hieronymum Tronum (qui bello Thracio Naupacti arcem, quam reipublicæ nomine custodiebat, hostibus tradiderat, eamque ob rem exul aliquot annos fuerat) id quod fecerat de tradenda arce, pretio accepto fecisse: Tronum ab exilio domum redeuntem in vincula conjecerunt, pauloque post quaestione habita, e superiore curiæ porticu, quæ in foro est, inter rubri lapidis columnas recte suspenso carnifex gulam fregit. Atque ultimis fere anni diebus Joannes Pisaurum obtinens Matthæi Teupoli filiam duxit uxorem, nuptiis in urbe per legatos institutis. Tum literæ ex Hispania ad Senatum ve-

H. Bembi.

Q

ne.